

INUIT ATAQATIGIIT

INATSISARTUNI



Tasiilaq, 12. marts 2014

Inatsisartut Suleriaasianni § 37 naapertorlugu Naalakkersuisunut imaattumik apeqquteqar-punga.

(Inatsisartuni ilaasortaq Harald Bianco, Inuit Ataqtigiit)

Apeqqut:

Kalaallit ilinniagaqartut, ilinniarnissartik siunertaralugu nunanut allanut nuuk-kallarsimasut Inatsisartunut aammalu kommuninut qinersinerni qinerse-qataasarnerat ajornannginnerulersinniarumallugu Naalakkersuisut qanoq suli-niuteqassamaapat?

Tunngavilersuut:

Inuusuttorpaaluit Kalaallit Nunaat qimallugu nunanut allanut ilinniariarlutik nuukkallartarput. Inuusuttut taakku Inatsisartunut aammalu kommuninut qinersinermut atatillugu qinersisinnaatitaanertik pigiinnartarpaat, taamaakkaluartorli kommunimi angerlarsimaf-fimminnit qinersisinnaasut allattorsimaffiannit peerneqartarput. Inatsisartunut qinersiso-qassatillugu taamaasilluni ilinniartup nammineq kommuunerisimasani qinnuigisariaqartarpaa qinersisinnaasut allattorsimaffiannut ilanngukkusukkuni imaluunniit allattorsimaffianniiginarusukkuni, tamanna nammineq noqqaassutigisassagaa.

Ilinniartup qinersinissap nalunaarutigiginissaa sioqqullugu malittarisassat ilisimangippagit taamaasillunilu qinersinissamut suaaruteqarnerup kingorna aatsaat allassimalernissaminik qinnuteqaruni, qinersinermi qinersisinnaatitaanissani ajornartorsiutigilersinnaavaa. Qinersisinnaassagaannimi piunasaqaataavoq, ulloq qinersivissaq sapaatip akunnerinik pingasunik sioqqullugu qinersisinnaatitaanerup aalajangiiffigineqareersimanissaa.

Periuseq tamanna Danmark-imi ilinniagaqartut maannut suli ajornartorsiutitaqarfiusartoo tikkuartarpaat.